

Elaun penjawat awam di luar negara dinaikkan mulai 1 Januari 2023

Oleh Rafidah Mat Ruzki - September 6, 2022 @ 9:54pm



Perdana Menteri, Datuk Seri Ismail Sabri Yaakob menyampaikan ucapan pada Majlis Perasmian Persidangan Ketua-ketua Perwakilan Diplomatik Malaysia Ke-9 (HOMC9) di Wisma Putra hari ini. - Foto BERNAMA

PM umum kenaikan elaun penjawat awam bertugas di luar negara

PUTRAJAYA: Perdana Menteri mengumumkan kenaikan elaun bulanan bagi penjawat awam yang berkhidmat di luar negara berkuat kuasa 1 Januari depan.

Datuk Seri Ismail Sabri Yaakob berkata demikian ketika menyampaikan ucapan sempena Persidangan Ketua-Ketua Perwakilan Diplomatik Malaysia Ke-sembilan (HOMC9) Secara Maya, malam ini.

"Kerajaan turut menggalakkan diplomat kita untuk menguasai bahasa asing selaras dengan keperluan menjalankan urusan rundingan diplomatik dan perdagangan dengan negara lain.

"Justeru, Kerajaan bersetuju untuk menaikkan elaun bulanan bagi penjawat awam berkhidmat di luar negara yang menguasai dan menggunakan bahasa asing dalam menjalankan tugas rasmi mereka, berkuat kuasa 1 Januari 2023," katanya.

Yang turut hadir, Menteri Luar, Datuk Seri Saifuddin Abdullah; Menteri Pengajian Tinggi, Datuk Noraini Ahmad; Menteri Pelancongan, Seni dan Budaya Datuk Seri Nancy Shukri dan Ketua Setiausaha Negara, Tan Sri Mohd Zuki Ali.

Perdana Menteri turut mengucapkan tahniah dan terima kasih kepada petugas Wisma Putra yang berkhidmat dengan penuh dedikasi demi kesejahteraan Keluarga Malaysia, di dalam dan di luar negara.

Beliau berkata, kerajaan prihatin dengan peranan penting yang dimainkan Kementerian Luar Negeri dan Perwakilan Diplomatik Malaysia di luar negara dalam membantu kerajaan mengurus pandemik dan menangani impak-impak negatifnya.

"Semasa dunia berdepan pandemik COVID-19 dan kebanyakan negara satu demi satu menutup sempadan antarabangsa masing-masing, Kementerian Luar Negeri dengan jaringan Perwakilan Diplomatik kita telah memainkan peranan penting," katanya.